



1. Radunanza cumünela dals 20.2.2019 a las 20.00 in sela polivalenta S-chanf

Presidi: Gian Fadri Largiadèr

Actuar: Gian Luca Vitalini

Preschaints: Preschaints sun 50 votantas e votants

Büro electorel: Maura Romerio Duschletta / Robert Angelini

Tractandas:

1. Protocol da la radunanza cumünela dals 28 november 2018
2. Reglamaint pels commembers da la cumischiun administrativa da l'Ouvra electrica cumünela inclus lur indemnizaziun
3. Cumischiun administrativa OE – tscherna da duos fin quatter commembers
4. Optimiser senda per viandants e velos da muntagna "Pass Chaschauna" dumanda da credit fr. 510'000.00
5. Ledscha davart il tegner chauns illa vschinauncha da S-chanf (Ledscha da chauns)
6. Varia

Zieva la proposta da sar Duri Campell regard la tractanda trais, da müder il titel da duos commembers sün duos fin quatter commembers vain la glista da tractandas approveda cun granda magiurited.

Protocol: Il protocol da la radunanza cumünela dals 28 november 2018 vain approvu cun fich granda magiuranza e sainza cuntravusch.

1 0.110 Legislativa Reglamaint pels commembers da la cumischiun administrativa da l'Ouvra electrica cumünela inclus lur indemnizaziun

A la votaziun a l'urna dals 04 marz 2018 haun las votantas e'ls votants aderieu al concept da forz'electric 2020 e l'acceptaziun da la rait davent dals 01. october 2020 cun üna quota da vuscher d' 84%.

A la votaziun a l'urna dals 23 settember 2018 haun las votantas e'ls votants aderieu a la revaisa parziela da la constituziun cumünela (art. 59 bis) cun üna quota da vuscher da 92% e s-chaffieu la basa per funder l'OE S-chanf. Impü ho la radunanza cumünela ils 24 october

2018 approvo la ledscha OE. Per cha'ls commembers da la cumischiun da las OE paun piglier sù immediat las lavuors da la cumischiun, suottametta la suprastanza cumünela a la radunanza cumünela il «Reglamaint pels commembers da la cumischiun administrativa da l'Ouvra electrica cumünela inclus lur indemnizaziun».

Proposta:

La suprastanza cumünela propuona d'approver il «Reglamaint pels commembers da la cumischiun administrativa da l'Ouvra electrica cumünela inclus lur indemnizaziun» (OE reglamaint-cumischiun).

Decisiun:

La radunanza cumünela aderischa il «Reglamaint pels commembers da la cumischiun administrativa da l'Ouvra electrica cumünela inclus lur indemnizaziun» (OE- Reglamaint-Cumischiun) cun granda magiurited e sainza cuntravusch.

**2 0.113 Elecziuns
Cumischiun administrativa OE – tscherna da duos fin quatter
commembers**

La „ledscha davart l'organisaziun e l'administraziun da l'Ouvra electrica cumünela» prevezza la tscherna dals commembers da la cumischiun administrativa tres la radunanza cumünela. La suprastanza cumünela propuona la tscherna da seguaints duos candidats cumpetents:

Curdin Barblan, 1982, S-chanf

Indschegner da maschinas FH cun scolaziun supplementera in direcziun d'intrapraisas

Giacum Krüger, 1982, Malögia

Indschegner d'electricited FH cun scolaziun supplementera in direcziun d'intrapraisas

Impü vegn ün commember da la suprastanza delegio illa cumischiun administrativa.

Proposta:

La suprastanza cumünela propuona da tscherner a Curdin Barblan e Giacum Küger illa cumischiun administrativa da l'OE.

Our dal ravuogl vain fatta la proposta, cha la cumischiun administrativa dess avoir 5 commembers, invezza da trais scu propost da la suprastanza cumünela. Eir es il votant da l'avis, cha tuot ils commembers da la cumischiun haun da gnir tschernieus da la radunanza cumünela, eir il delegio da la suprastanza (Ledscha OE Art. 15).

La suprastanza es da l'avis, cha'l rapreschantant da la suprastanza po gnir delegio da la suprastanza cumünela (Art. 18, al. 2).

Reguard quista dumanda fo la suprastanza sclarimaints cul giurist. Scha'l delegio da la suprastanza ho propi da gnir tschernieu da la radunanza cumünela fo la suprastanza la proposta adequata a maun da la prosma radunanza.

Impü vain fat our dal ravuogl la proposta da tscherner a sar Duri Campell scu ulteriur commember da la cumischiun administraiva. Sar Duri Campell es perinclet cun la nominaziun. Medemmamaing vain fatta la proposta da tscherner a sar Heinz Thomas illa cumischiun administrativa. Sar Heinz Thomas as retira da la nominaziun.

Decisiun:

La radunanza cumünela decida cun granda magiurited, cha la cumischiun dess avoir 5 commembers illa cumischiun administrativa. Cun la proposta dal president da tscherner

tuot ils commembers in globo, es la radunanza cumünela perincletta. La radunanza cumünela tscherna ils trais commembers proponieus, sar Curdin Barblan da S-chanf, sar Giacom Krüger da Malögia e sar Duri Campell da Chapella. Per la piazza vacanta vain do la pussibilted da s'annunzcher per quista carica tar la suprastanza cumünela.

3 7.900 Planisaziun dal territori cumünel
Optimer senda per viandants e velos da muntagna «Pass Chaschauna» - dumanda da credit fr. 510'000.00

La ruta da velos da muntagna 444 dal maraton da velos dal Parc Naziunel maina da Livigno sur il Pass Chaschauna in Engadin'Ota a S-chanf. I's tratta d'üna part stippa e pretensiusa. La senda vain ütiliseda medemmamaing eir scu senda per viandants ed es correspudentamaing signaliseda. A basa dal trassè dischfavuraivel da la senda do que tres precipitaziun e d'ova da naiv adüna darcho grands dans d'erosiun i'l terrain stip, quels staun gnir cumados cun grands cuosts da mantegnimaing.

La suprastanza cumünela ho incumbenzo la firma Eco Alpin SA da Schlarigna d'elavurer ün preproget.

Il preproget preschaint cuntegna l'optimaziun da la part dal sector Alp Chaschauna fin Pass Chaschauna. Ad es previs da transferir la senda cun ün trassè uschè, cha a regard la pendenza e la pusiziun da la senda illa cuntredgia po gnir optimada a media fin lungia vista in ün bun stedi e cun pocha lavur da mantegnimaing.

Ils cuosts pel nouv fabricat da la senda e la renatüralisaziun da la senda existenta vegnan taxos sün fr. 510'000.00. A divers uffizis sun gnidas fattas dumandas da contribuziuns. I po gnir fat quint cun imports fin 20% dals cuosts totels. La realisaziun da quist proget es previs i'ls prossems 2 fin 3 ans. I'l plan d'investiziun sun previs totelmaing fr. 600'000.00 pels ans 2019 – 2022 per las imsüraziuns dal «Masterplan Mountainbike».

Proposta:

La suprastanza propuona a la radunanza cumünela da deliberer il credit da fr. 510'000.00.

Decisiun:

Zieva animada discussiun e differentas objecziuns our dal ravuogl, deliberescha la radunanza cumünela cun fich granda magiurited e 5 cuntravuschs il credit da fr. 510'000.00 per pudair optimer la senda per viandants e velos da muntagna «Pass Chaschauna».

4 0.110 Legislativa
Ledscha davart il tegner chauns illa vschinauncha da S-chanf (Ledscha da chauns)

La cumischiun „revisa da la constituziun, da las ledschas ed dals uordens da la vschinauncha da S-chanf“ ho elavuro la ledscha davart il tegner chauns illa vschinauncha da S-chanf (Ledscha da chauns). La ledscha fuorma la basa leghela per inchascher l'imposta da chauns e da druver las entredgias per indemniser las lavuors administrativas colliedas cun l'execuziun da quista ledscha scu eir per construir e controller ils implaunts d'infrastructura in connex cul tegner chauns.

Proposta:

La cumischiun propuona d'appruver la ledscha davart il tegner chauns illa vschinauncha da S-chanf.

Impü vain fat la proposta our dal ravuogl, da stricher l'art. 9, e per mincha chaun s'ho da pajer la taxa eir in cas d'ün chaun da servezzan.

Decisiun:

La proposta chi'd es gnida fatta da stricher l'art. 9, vain sbütteda cun fich granda magiurited. La radunanza cumünela decida cun fich granda magiurited d'approver la ledscha davart il tegner chauns illa vschinauncha da S-chanf sainza cuntravusch.

5 9.999 Varia

Il president spiega a la radunanza cumünela regard ils termins politics da l'an 2019 e las tematicas illas radunazas previsas. Impü spiega el ils termins importants per la vschinauncha da S-chanf traunter oter regard la lingia d'ova traunter S-chanf e Zuoz, la halla da deposit da la resgia, la fabrica da l'infrastructura a Susauna e l'ultima etappa da la rait da fibra da vaider.

Ün votant fo la dumanda cur cha la cunvegna in connex cun la lingia d'ova traunter S-chanf e Zuoz vain trattada in radunanza cumünela. Il president spiega la radunanza cumünela, cha la vschinauncha ho surdo la lavur per fer üna proposta correspundenta al büro d'indschegner Martin Gini. Il büro Gini glivra eir auncha il QS da l'ova da la vschinauncha da S-chanf, chi'd es auncha aviert daspö l'an 2013. Üna tractanda regard quista fatschenda es prevista in üna radunanza cumünela d'utuon.

Eir regard il contrat da servitut da la lingia d'ova persa sül areal da la Bos-chetta Plauna vain auncha fat la dumanda cur cha quel vain preschanto a la radunanza cumünela. Il president spiega, cha la Bos-chetta Plauna SA es pronta da surpigliar ils cuosts in quista chosa, e cha'l contrat vain preschanto infra temp ütil in üna da las proschas radunanzas cumünelas.

Ün votant dumanda auncha regard sieu contrat da terrain chi'd es pendent daspö l'an 2015. Il depüto Roman Parli surpiglia il pled e spiega, cha la cumischiun da planisaziun saja landervi da quista fatschenda.

Ün oter votant dumanda auncha scu chi vo inavaunt culla planisaziun da la halla da glatsch regiunela. El renda attent, cha la supranza cumünela stu uossa mobiliser la glieud ed infurmer quella, cha la vschinauncha da S-chanf ho üna schanza da pudair metter a disposiziun il terrain per pudair fabicher ün tel proget, e da persvader las otras vschinaunchas, cha'l lö a S-chanf füss l'optimal lö, per fabicher üna halla da glatsch immez l'Engiadina e cha tuots paun ütiliser quella.

Impü vain fatta la dumanda, cur cha la vschianuncha da S-chanf ho planiso da fer la revaisa da la ledscha da fabrica. Eir lo es la cumischiun da planisaziun landervi da fer auncha sclarimaints, chi's po piglier in vista da fer la revaisa da la ledscha da fabrica infra temp ütil.

Il president serra la radunanza a las 22.00 ed ingrazcha a tuot ils preschaints per lur cumparsa.

In buna fè

Il president:

L'actuar:

G. Largiadèr

G. L. Vitalini